

Amanat Asri kepada ahli PAS:

# JANGAN SENTIASA SALAHKAN ORANG LAIN

Oleh  
**MIOR KAMARUL SHAHID**

Bahan asal dari Arkib  
Negara Malaysia

**KUALA LUMPUR,** Sabtu — Pengikut PAS tidak seharusnya bersikap negatif terhadap penubuhan Bank Islam dan Universiti Islam Antarabangsa yang dilaksanakan oleh Kerajaan.

"Kita tidak boleh bersikap negatif dengan memandang sepi dan buruk belaka pada apa saja yang dilakukan oleh orang lain, seolah-olah baik semuanya dari kita dan dari orang lain semuanya buruk dan tidak betul," tegas Yang Dipertua Agung PAS, Datuk Haji Mohd. Asri Muda, kepada para perwakilan ketika merasmikan Muktamar Tahunan PAS Ke-28 di sini hari ini.

Datuk Asri menyeru pengikut partinya bersikap objektif dan jujur dalam setiap anggapan dan tanggapan kepada semua masalah, sejajar dengan hasrat berjuang mencapai kebenaran dan menghayati ajaran Islam.

Yang Dipertua Agung PAS itu berkata, kelahiran projek Bank Islam adalah suatu langkah yang baik dan akan menjadi suatu penceritaan baru di bidang ekonomi serta memperlihatkan kemampuan konsep Islam kepada masyarakat.

Beliau berharap, penubuhan Bank Islam akan menjadi titik permulaan ke arah mengubahsuai seluruh sistem ekonomi negara dalam masa yang singkat.

Penubuhan sebuah Universiti Islam Antarabangsa pula, katanya, akan melahirkan satu generasi baru Islam yang bukan sahaja berilmu dalam bidang-bidang tertentu, malah beriman dan bertakwa, rela menawarkan khidmat kerana Allah.

Datuk Asri mengemukakan bahawa PAS sedar langkah menghapuskan judi akan menempuh berbagai bentuk halangan dan rintangan.

Bagaimanapun, PAS berharap kerajaan akan melaksanakan segera langkah menghapuskan judi terutamanya Loteri Kebajikan Masyarakat, Empat Nombor Ekor, Toto, perjujukan kasino, lumba kuda dan sebagainya.

Beliau juga mencajangkan supaya sistem pajak gadai diubah dengan satu sistem baru yang sama mudah tetapi halal di sisi Islam memandangkan ia adalah satu institusi kewangan yang menjadi tumpuan rakyat.

Datuk Asri seterusnya berkata, banyak langkah-langkah penuh sensasi diambil semenjak Perdana Menteri, Datuk Seri Dr. Mahathir Mohamad mengambil alih pimpinan Kerajaan.

"Kita akui bahawa langkah-langkah tersebut memang sensasi dan mudah memikat minat dan hati rakyat," katanya.